



Republika e Kosovës
Republika Kosova - Republic of Kosovo

Komuna e Prishtinës
Kuvendi i Kryeqytetit - Municipality of Prishtina



EKSTRAKT

i procesverbalit të mbledhjes së pestë të Komitetit për Barazi Gjinore, mbajtur më 19.12.2022, duke filluar në orën 16:00.

Në mbledhje morën pjesë: Violeta Salihu, Besart Krasniqi, Leonora Shabani - Bajraktari dhe Dhurata Jahaj -Retkoceri.

Mungoi: Gëzim Mehmeti.

E pranishme ishte edhe Premtime Preniqi, koordinatore për të drejtat e njeriut dhe barazi gjinore dhe Granit Makolli, përfaqësues nga Drejtoria e Sportit..

Mbledhjen e hapi dhe e kryesoi Violeta Salihu, kryesuese e komitetit dhe propozoi këtë

Rend të ditës:

- 1. Miratimi i ekstraktit të procesverbalit të mbledhjes së katërt të Komitetit për Barazi Gjinore;**
- 2. Diskutim rreth përgatitjes së Planit të punës për vitin 2023,(priten rekomandime nga anëtarët e tjerë të komitetit për ta plotësuar këtë plan);**
- 3. Rëndësia e përkrahjes së klubeve të vajzave në sport;**
- 4. Të ndryshme.**

Pika e parë

Miratimi i ekstraktit të procesverbalit të mbledhjes së katërt të Komitetit për Barazi Gjinore

Kryesuesja konstatoi se njëzëri u miratua ekstrakti i procesverbalit të mbledhjes së katërt të Komitetit për Barazi Gjinore.

Pika e dytë

Rëndësia e përkrahjes së klubeve të vajzave në sport

Violeta Salihu, kryesuese tha se sa i përket përkrahjes së klubeve të vajzave, mendoj se kur të jepen subvencionet duhet të jepen me njëfarë rregulli, me një rregullore të shfrytëzimit të atyre mjeteve. Përderisa klubi nuk ja u paguan as transportin në shumicën e rasteve vajzave kur udhëtojnë jashtë Prishtinës, kur humbin ndeshjen nuk ua paguan drekën, kur fitojnë ja u paguajnë, pra është një e

vërtetë se ato shpesh mbesin në mëshirën e fatit si do të kthehen prej ndeshjes kur janë në qytete të tjera.

Granit Makolli, përfaqësues nga Drejtoria e Sportit tha se ne si Drejtori e Sportit buxhetin e kemi të ndarë në atë mënyrë që ti subvencionojmë në dy faza klubet sportive ku ka qenë një shumë përafërsisht 5 mijë euro dhe janë përkrahur dy herë, kështu që drejtoria ka analizuar se cilat janë ato klube më me prioritet dhe të subvencionohen. Në subvencionim nuk është paraparë ushqimi, pra faturat e ushqimit nuk pranohen, ndërsa në transport ne i përkrahim me mjete financiare.

Violeta Salihu, kryesuese tha se në mesin e vajzave sportiste ka pakënaqësi rreth ndarjes së mjeteve kështu që ato mjete asnjëherë nuk jepen në mënyrë të rregullt.

Dhurata Jahaj-Retkoceri, kërkoi të dijë se a ka ndonjë organ mbikëqyrës rreth ndarje së këtyre mjeteve financiare.

Granit Makolli tha se ne kemi edhe organ mbikëqyrës, mirëpo ne si drejtori kemi një staf shumë të vogël kështu që edhe ata nuk kanë të drejtë të dalin nëpër teren.

Violeta Salihu, kryesuese tha se me të vërtetë është shqetësuese fakti që ato vajza të cilat humbin lojën nuk ju paguhet ushqimi si dhe transportin nuk e kanë të sigurt, kështu që kjo për mua është tejet shqetësuese.

Leonora Shabani-Bajraktari tha se ne si komitet duhet të angazhohemi dhe të ndikojmë tek drejtoria që mjetet financiare në mënyrën më të mirë ti dërgojmë në vendin e duhur, ku përkrahen sidomos vajzat e reja, ku ne i stimulojmë që ato të merren me sport. Ne duhet ta ngritim zërin që mos të manipulohet me vajzat tona. Angazhimi i tyre në sport gjithsesi do të ishte më se e nevojshme për moshën që e kanë ato. Është mirë që ne të bëjmë diçka si barazi gjinore, ta ngritim zërin në media dhe të flasim sa më shumë.

Violeta Salihu, kryesuese po ashtu tha se kur nënshkruhet një kontratë për pagesë ajo bëhet obligative që të përmbushet, prandaj pse mos të përmbushet, ato vajza sportiste janë të reja, duhet të stimulohen për të arritur suksese.

Granit Makolli, gjithashtu ceku se klubet sportive kërkojnë mjete financiare për gara, pagesa për referat, për sallë, transport, etj.

Dhurata Jahaj-Retkoceri tha se gjithsesi duhet të jetë një organ mbikëqyrës të dihet se ku shkojnë ato mjete dhe si shpenzohen ato, por në realitet kuptohet se ndonjëri prej sportistëve po ka imunitet që e ka babanë biznesmen kështu që anashkalohen të tjerët e që ndoshta janë më të talentuar. Gjithashtu do të ishte mirë që të shikohet se si i ka politikat një klub, a ndryshon prej klubit në klub politika, a e kanë një ligj të njëjtë.

Violeta Salihu, kryesuese tha se do të ishte mirë që ne si komitet të jemi prezent një ditë që ti përcjellim ushtrimet sportive që i bëjnë ato vajza , kështu që edhe ato të jenë në dijeni se po përkrahen. Po ashtu kërkoi të dijë se klubi i vajzave të futbollit a përkrahet sikurse klubi i djemve, pasi që më parë ka pasur dallime të mëdha. Gjithkund është e paraparë me rregull që ti sigurojnë ushqimin dhe transportin që ato vajza të kthehet në shtëpi.

Lidhur me pyetjet dhe disa shqetësimeve të ngritura nga anëtarët e komitetit, sqarime të nevojshme dha Granit Makolli, përfaqësues nga Drejtoria e Sportit.

Pika e tretë

Diskutim rreth përgatitjes së Planit të punës për vitin 2023,(priten rekomandime nga anëtarët e tjerë të Komitetit për ta plotësuar këtë plan)

Violeta Salihu, kryesuese tha se ne planin e punës e kemi pasur prej muajit gusht, kështu që tani ne duhet të mendojmë se si të jetë plani i ardhshëm për vitin 2023, ku dhe do ti marrin edhe disa rekomandime nga anëtarët e komitetit. Pra se të fillojmë me hartimin e këtij plani, mendoj se do të ishte mirë që të takohemi me institucionet që e parandalojnë dhunën, pra që të kemi informata rreth kësaj çështjeje.

Premtime Preniqi tha se do të ishte mirë që edhe në bashkësitë lokale të jenë të sistemuara edhe femrat në pozitat udhëheqëse, kështu që pse mos të jetë një femër edhe kryetare e bashkësisë lokale, kështu që kjo temë mund të jetë në rend të ditës në mbledhjet e radhës së komitetit.

Violeta Salihu, kryesues tha se do të ishte mirë që të mbahet një seancë e organizuar nga kryetari apo nënkryetarja dhe të diskutohet se çka është bërë rreth punësimit të grave, pra sa janë të punësuar nga gjinia mashkullore, sa nga gjinia femërore, në çfarë pozita etj.

Leonora Shabani-Bajraktari kërkoi të dijë se ne si komitet a kemi të drejtë të kërkojmë prej burimeve njerëzore se sa gra janë të punësuar kur i krahasojmë me burrat në Komunën e Prishtinës, pa i futur mësueset dhe pa i futur infermieret vetëm në objektet e Komunës.

Premtime Preniqi, sa i përket punësimit të gjinisë femërore në Komunë tha se shumë pak dallon numri me të punësuarit meshkuj.

Besart Krasniqi tha se në Komunë gjithmonë ka pasur në sportele femra më shumë, sidomos në shërbimin te tatimi në pronë.

Violeta Salihu, kryesuese tha se në muajin mars, në javën e gruas mendoj se do të ishte mirë që ta kemi një seancë me temën rreth rolit të gruas në shoqëri, apo ndonjë dokumentar ose një mbrëmje poetike. Po ashtu edhe në muajin prill mund ta organizojmë një tryezë për rendësinë e promovimit të gruas në politik në nivelin lokal. Po ashtu më vonë në korrik- tetor me asociacionin e gazetarëve, kështu që ti ftojme ndonjërin prej gazetarëve, sepse edhe këta gazetar nuk i promovojnë gratë në politikë dhe të dalim me një konkluzion së bashku me ta.

Leonora Shabani-Bajraktari tha se është mirë që Komiteti për Barazi Gjinore në bashkëpunim me grupin e grave asamblastë, ta ketë një takim ku është edhe OSBE-ja që i ofrojnë trajnime për gratë asamblastë, e që jam e sigurve që shumica prej tyre nuk e dinë çka është buxheti i përgjegjshëm gjinor.

Premtime Preniqi tha se në muajin janar janë në program disa trajnime dhe mendoj se gratë asambliste do ti ftoj që të marrin pjesë në një trajnim për eficientë.

Violeta Salihu, kryesuese tha se sa i përket rishikimit të buxhetit është mirë të flasim pastaj çka mund të bëjmë, me shikuar çfarë projekte mund të qojmë përpara, kur është koha e subvencioneve, ku mund ti përkrahim gratë më shumë, ndoshta edhe tek punësimi, tek projektet.

Besart Krasniqi tha se ne si komitet a mund të kemi ndikim që me e mundësuar ndonjë trajnim për gratë sidomos ato që kanë dhunë në familje, t'i integrojmë si psh. në ndonjë trajnim për frizerka ose rrobaqepësi që nesër, pasnesër të pavarësohen prej atyre trajnimeve.

Leonora Shabani-Bajraktari tha se tek buxheti i përgjegjshëm gjinor është më mirë që p.sh me e shty Komunën që secila rrugë që ndërtohet ta ketë trotuarin d.m.th. ajo është që a na dëgjon dhe a mund ta bëjmë, por aty duhet ta planifikojmë, që jo vetëm rruga por duhet të ketë edhe trotuar edhe ndriçim.

Violeta Salihu, kryesuese tha se të gjitha këto sugjerime dhe propozime do ti inkorporojmë në Planin e punës së komitetit për vitin 2023.

Mbledhja përfundoi në ora 17:15

**Procesmbajtësi
Zijadin Gashi**

**Kryesuesja e Komitetit
Violeta Salihu**



Faqe4nga4